

台灣問題 ê 要點

(台灣青年第十號特刊號社論)

原篇刊 tī 台灣青年第十號 (September, 1961)

「翻譯之一」 1/2 翻譯：嬰孫

翻譯者簡單介紹本篇 ê 內容

台灣青年第十號，mā 是特刊號。頂擺 ê 特刊號(第六號) 是專門刊二二八事件台灣人爭取自治無成功 ê 悲劇。

這擺 ê 特刊是 teh 批評蔣介石 khiā 頭 ê 國民政府。文章真長，攏總有 60 外頁，所以台語翻譯 beh 分作 3 篇來介紹。

本社論 kā 國民政府叫作中國難民同盟，chham 國民政府走來台灣 ê 人號作中國難民，中國難民分作 3 個集團。第 1 集團是蔣介石 chhōa 頭 ê 一陣大粒仙，第 2 集團是家己認定無願意受中共統治 ê 人，第 3 集團是強制 hông 徵去作兵 ê 阿兵哥，kap tùi Indo-China (中南半島)中越國境、Burma(緬甸)中緬國境撤退 ê 中國軍人 kap 生理人。

「翻譯之一」是有關台灣青年所號 ê 第 1 集團，內容包括蔣介石 chhōa 頭逃亡來台灣 ê 經過，kap 伊 ê 孝生蔣經國整頓反對派加強蔣家獨裁制度 ê 故事；「翻譯之二」介紹第 2 集團；「翻譯之三」是介紹第 3 集團。

本特刊號分析「中華民國」kap 國民政府到底是啥物碗糕？為啥物國民政府愛講「一個中國」？kap 150 萬 tòi 國民政府來台灣 ê 中國人，in ê 利害關係敢完全相像？。最後 beh 檢討難民同盟 ê 命運。

本篇內容：社論「台灣問題 ê 重點」

「台語翻譯之一」· 中國難民第 1 集團(第 1 頁~第 18 頁)

- (一) 國民政府是一個難民同盟
- (二) 難民同盟會 tàng 分作 3 個集團
- (三) 難民 ê 代表蔣介石
- (四) 難民 ê chhōa 頭蔣經國

「翻譯之二」(第 19 頁~第 27 頁)

- (五) 夾 tī 中間 ê 第 2 集團
- (六) 第 2 集團 ê 不滿

「翻譯之三」(第 28 頁~第 60 頁)

- (七) 兵營內 ê 第 3 集團
- (八) 兵營外 ê 第 3 集團
- (九) 難民同盟 ê 運命

社論：「台灣問題 ê 重點」

「台灣問題 ê 重點 tī 叨位？」若是有人應講「台灣問題 ê 重點 tī 台灣人堅定 ê 獨立自治 ê 意願」，這個答案 m̄ 是正確。若有人會應講「解決台灣問題 ê 關鍵在 tī 蔣介石抑是蔣經國 ê 手頭」，「chham 美國 tùi 台灣政策 ê 變化有關係」，「chham 聯合國討論中華人民共和國加入聯合國政策 ê 變化有關係」，「kap 中華人民共和國主張 beh 解放台灣有關係」，chia-ê 答案攏總 mā m̄ tiòh。正確 ê 答案就是「tī 蔣介石 ê 70 萬軍隊」。

這陣 70 萬軍隊是蔣介石為著 beh 保證實行這 10 冬內所主張 ê 「反攻大陸」。屬 tī 國民政府制度各層階級 ê 中國難民，加減有相信蔣介石 ê 主張，甘願忍耐安慰家己，渡過流浪 ê 日子。M̄-kú 9 百萬台灣人，為着 in beh 實行「反攻大陸」ê 目標，tō ài hō 這個政策縛着，失去自由，過奴隸 ê 生活。

國民政府 ê 軍隊 ê té-ti 真莫明奇妙，in 會 tàng 左右台灣 ê 將來。台灣人 ài 飼 ê 70 萬軍隊，其中真正會相拍 ê 無夠 40 萬人，chhun 落來 ê，攏是 hiah-ê 會食 bē 相咬。實際上，美國 ê 軍事援助是針對這 40 萬人軍隊。其他 ê 30 萬人中間，部分是為著 beh 支持蔣經國 ê 獨裁，hông 編入去恐怖機關；另外 ê 就是「老兵」。老兵有路無厝 thang 好轉去，所以國民政府不得已 ài kā 留 tī 兵營 kā 飼。有一項 m̄-tang bē 記得 ê 代誌是這 40 萬會相拍 ê 軍隊內底，基本 ê 士兵是蕃薯 á，差不多 beh 到有 20 萬人，佔美援部隊 ê 半數。

國民政府去 hō 2 項相對頭 ê 矛盾縛 tiâu leh teh 傷腦筋，這 2 項矛盾 lú 來 lú 嚴重。第 1 項是蕃薯 á 士兵 tī 國民政府軍隊內面所佔 ê 比例 lú 來 lú 大。蔣政權用殖民政政策統治台灣，但是 in tùi hō 受壓制 ê 人 giâ 槍並無自信，m̄-kú 國民政府統治 ê 地區干單是台灣 kap 金馬小島 nā-niā。In 無其他 ê 選擇，一定 ài 用蕃薯 á 士兵。第 2 項矛盾就是 in 無才調飼所有 ê 老兵，攏總 kā 留 tī 兵營，只好 ài kā 10 萬人以上 ê 老兵送入去台灣社會。Chiah-ê 退伍老兵每日 ê 生活無保障，自然會怨嘆統治者無照顧 in。留 tī 兵營 ê 老兵，m̄-niā bē-tàng 轉去大陸，bē-tàng 結婚成家，hông 束縛 tī

兵營。In ê 運命就是等死，無就是破病 hōng 趕出兵營，所以 in 絕望、敗德，無主張。國民政府軍隊就是 kā 不 sám 時 tō 想 beh 轉去故鄉 ê 老兵 kap 向望 beh 做台灣人 ê 蕃薯 á 少年兵 lām-lām 作一伙 ê 團體。雖然老兵 chham 少年兵 ê té-tì 無相像，m-kú，in ê 心內攏有一個全款 ê 寄望，就是國民政府 ài hō 倒。

(一) 國民政府是一個難民同盟

難民同盟 ê té-tì

咱台灣人向望台灣 ê 民主化 kap 自治。無論啥物人，若是有了了解台灣現此時 ê 情形，無一個人會認為定台灣是一個民主國家。

國民政府 kā 台灣變作一個差別真明顯 ê 社會，he 是一個存心 beh kā 台灣人 ê 社會維持大差別 ê 獨裁統治集團。全世界敢有任何一個獨立國家實行比台灣 koh-khah 厲害 ê 差別政策？可能有人會應話講南非聯邦以外無第 2 個國家。若是按呢，敢有一個任何獨立國家 in ê 獨裁統治比台灣 koh-khah 厲害？對這條問題 ê 答案可能會 tàng chhōe 出幾 ā 個 chham 國民政府有邦交 ê 國家。M-kú，全世界無一個國家實行比台灣 koh-khah 嚴重 ê 政治壓迫 kap 違背人權。

台灣 ê 獨裁制度是 tùi 中國大陸流亡來台灣 ê 中國人作出來 ê。In 自本就是 chham tùi 東德流亡去西德 ê 德國 ê 難民相像 ê 難民。東德人流亡去西德，kap 西德人有一個共同 ê 向望就是 beh 收回失去 ê 領土，這個共同 ê 願望 hō in 團結，造成一種 ê 難民同盟。M-kú，台灣 m 是按呢，台灣 ê 難民同盟 tō 是流亡政府，為着 beh 維持流亡政府 ê 存在 teh 控制台灣。這點 chham 德國 ê 難民同盟大大無全款。台灣 ê 難民同盟無按算久長 beh tòā tī 台灣，in ê 政治主張是「反攻大陸」，所以流亡政府 ê 一切制度是根據「反攻大陸」ê 政策定出來。獨裁者用這個制度統治 9 百萬人台灣人 kap 預防難民同盟 ê 分裂。若是 beh 了解台灣人 ê 向望 kap 台灣 ê 將來，一定 ài 代先知影台灣現此時 ê 情形。為着 beh 知影台灣現此時 ê 情形，一定 ài 了解難民同盟 ê 本質。

為啥物理由周恩來 beh 支持國民政府

今年 6 月，周恩來總理對訪問北京 ê 一陣日本人發表中華人民共和國對台灣新 ê 見解。伊 ê 見解就是日本 ê 軍國主義者向台灣 chhōe 出路。3~4 年前有關第 3 次國共合作伊 bat 講大聲話。伊真有自信講中共 chham 台北會 tàng 直接講話 kap 互相交涉 ê 路線已經安排好勢。M-kú 這擺講 chham 頂擺少少 á 無相像，有 teh 着急 ê 款，伊講：「過去美國、蔣介石 kap 日本 3 方面有 teh 協力，但是過無 lōa 久這個協力 tō 強 beh 崩落去。美國想 beh 放棄蔣介石，beh hō 台灣獨立。日本軍國主義者 mā 是

teh 計劃 hō 台灣人建立家己 ê 獨立國家。所以蔣介石 chham 美國 kap 日本 ê 關係會 bē 好勢。美國 teh siàu 想最後托管台灣。日本 mā 想 beh 侵略台灣。所以，日本 kap 美國 ê 協力 mā bē 好勢。總講一句日本軍國主義者 ê 計劃會 bē 成功。」

頂面周總理所講 ê 話，其實是代表伊心肝內所想 beh hō 美國 kap 日本相對頭 ê 分化工作，總是，會 tàng khiā tī 周總理 ê 立場去分析今 á 日 ê 台灣問題 mā 是真有價值。周總理為着中共家己 ê 利益講下面 ê 話：「若是承認台灣是獨立國家，蔣介石 kap chham 蔣介石去台灣 ê 人攏會轉來中國。若是台灣發生政變，蔣介石雖然是老，伊會靠伊 ê 軍隊抵抗。陳誠 kap 蔣經國 mā 是會真拍拚抵抗」。周總理 ê 理論 tō 是：若是蔣介石 beh 預防伊 ê 部下起叛，伊一定 ài 堅持「一個中國」。國民政府靠 70 萬 ê 軍隊，有得着走去台灣所有中國人 ê 支持。國民政府若是有法度維持 in ê 制度，台灣無可能獨立。所以中共若是 beh 解放台灣，有一個條件就是國民政府一定 ài 繼續存在。

周總理攏無興趣 kap 蔣介石 chhōa 頭流亡去台灣 ê 彼陣人講起伊 ê 理論，mā 是無興趣 kap 台灣人宣傳伊 ê 理論。咱台灣人 mā 是無 teh siàu 想周恩來替台灣人出力拍倒國民政府。Ah 伊 mā 無期待台灣人去拍倒國民政府，伊干單期待國民政府 bē 崩倒去 nā-niā。

奇奇怪怪 ê 人口調查

1959 年 11 月，國民政府有作「大陸來台國民調查」。這個調查對象是滿 14 歲以上 ê 中國人。立法院、省議會 kap 媒體因為 m̄ 知調查 ê 目的，攏總表示 bē 爽。內政部長辯解講是為着 beh 計劃反攻大陸以後 ê 行政，有需要人事資料。台灣人無一人會相信這款辯解。大家攏 teh iōh：若是有實行公民投票，抑是托管台灣投票 ê 時陣，為着 beh 投反對票作準備。黃啓瑞競選台北市長 ê 時陣，伊 ê 台灣人助選參謀 siuⁿ 過出風頭，人 iōh 講，he 是 teh 準備將來聯合國若是舉行托管台灣公民投票 ê 時陣，beh 投反對票 ê 演習。

總是無人真正知影調查 ê 目的，一切 ê 調查攏照蔣經國 ê 命令舉行。每一個人分一張調查表，ài 登記籍貫、大陸 ê 住址 kap 3 代祖孫、兄弟姐妹直屬親屬 ê 姓名 kap 住址。死亡者 m̄ 免登記。中國人流亡來台灣已經有十冬，這個中間台灣 chham 中國無通批，按怎會 tàng 知影啥物人猶 tī-leh，抑是已經過身去。到底這個調查有啥物路用，tō ài 去問蔣經國本人才會清楚。

事實上，為着 beh 調查 150 萬人走來台灣 ê 中國難民，無需要填寫真 chē 調查表。理由是台灣人 chham 中國難民基本上無相像，根本 m̄ 免寫調查表 tō 會 tàng 知影啥人是台灣人，啥人是中國人。蔣介石 chhōa 頭 ê 國民政府欺騙講台灣人 chham 中

國難民是仝款。Bē 少外國人看會出台灣人 kap 中國人中間有一條深溝，所以台灣人 chham 中國人無仝款。M̄-kú 這款外國人無一定會 tàng 了解中國難民 ê 中間 mā 是有深溝。

(二) 難民同盟分作 3 個集團

中國難民 ê 本質原底並 m̄ 是攏總相像。150 萬人 ê 中國難民真明顯分作 3 個集團。第 1 集團是蔣介石 kap 上蓋接近伊 ê 國民政府最 kōan 領導人員。第 2 集團是國民政府中央 kap 地方政府 ê 高級軍警 kap 官員、議員、政治人物、特務人員 kap 生理人 chham in ê 親戚。第 3 集團是 hō 國民政府撤去作兵 ê 阿兵哥。

第 1 集團

第 1 集團 ê 特點是送 in ê 子弟去美國居留。送子弟去美國 ê 目的就是有一日台灣若變作無安全 ê 時陣，in 會 tàng 隨時走路去美國。In 已經有經驗走路來台灣，所以到時 in 一聲 tō 會使放掉台灣走去美國求平安。

第 2 集團

第 2 集團 ê 特點是驚會 hō 中共掠去。雖然國民政府命令政府 ê 軍警官員攏 ài 撤退去台灣，連 in 家己本身 mā 決定 beh 走來台灣求平安。Chiah-ê 人乖乖 á 聽國民政府 ê 命令撤退走來台灣，來台灣以後差不多攏總 hōng 編入國民政府 ê 政治組織(備註一)。雖然 in 心肝內 bē 爽，但是為着求生存，只有服從。這個集團 ê 人所靠 ê 後山國民政府若是崩倒去，in beh 按怎？In 無錢 thang 走去外國，所以大部分 ê 人會轉去中國，chhun 少数 ê 人留落來 tōa 台灣，。

第 3 集團

第 3 集團 ê 人數上 chē，大約佔全部集團 ê 3 分之 2。成員包括 1949 年~1950 年 tùi 青島、上海、廈門 kap 廣東 ê 港口來 ê 軍隊；tùi Indo-China (中南半島南) kap Burma (緬甸) 撤退 ê 軍隊；1953 年韓戰掠着 ê 中共兵；1955 年 tùi 大陳島用槍尾刀硬壓來台灣 ê 全部百姓；1958 年 tùi 金門島強制載來台灣 ê 一部分百姓。蔣介石過去就是靠這個集團 ê 拳頭母 teh 統治台灣。這個集團已經有 10 萬人退伍失去集團 ê 資格。第 3 集團 ê 阿兵哥 chham 第 1 集團 kap 第 2 集團 ê 難民無相像，in 自本 tō m̄ 是難民，當初若 m̄ 是國民政府 kā in 硬載來台灣，in 留 tiám 中國，中共 bē kā in 槍殺，mā bē hōng 送去集中營勞改，mā m̄ 免驚 hō 中共管。In hō 國民政府違反家己 ê 意願強 chhōa 來台灣，大部分無結婚，無家庭，無財產。服役 ê 時 tōa tī 兵營，退伍了 tō 換去台北抑是高雄 ê 大都市拍工，作小生理。甚至有人 tī 中央山脈

退伍兵農場作工渡過艱苦 ê 日子。In 心內迫切希望會 tàng 趕緊轉去中國故鄉，in tī 台灣干單受統治者 ê 壓迫，真鬱卒，暝日 bē 爽，真有可能起神經。國民政府 ê 統治階級雖然真了解阿兵哥 ê 心情，總是無啥物好 ê 補求辦法。

(三) 難民 ê khiā 頭蔣介石

蔣介石 teh 想啥物

蔣介石 tòà ê 公館 tī 士林，士林公館 tùi 台北座烏頭 á 車有 4~5 分鐘 ê 路頭，公館就是起 tī 旺旺 ê 樹林內面。Tī hiah，有當時 á 會 tàng 看著 2~3 台烏色 ê Cadillac (卡特勒克) 車出出入入。順開車方向 ê 路邊憲兵、警察、穿中山服或是私服 ê 特務人員 khiā kah 滿四界。坐 tī 烏頭 á 車內底 ê 穿中山服 ê 安全人員不時 teh 監視路邊民衆 ê 行動。頭一台烏頭 á 車後面 ê 玻璃窗有吊窗簾，獨裁者蔣介石 chē tī 內面。這個獨裁者 m̄ 知看著啥物，伊 ê 頭殼內 m̄ 知 teh 想啥物？

蔣介石因為反蔣運動失去人氣，一時下台，忍耐拍輸，轉去伊 ê 故鄉奉化匿。1949 年 4 月尾伊 koh tī 上海現身，hō 一大陣 ê 衛兵部隊保護 tiâu-leh。伊 tòà ê 厝用 tō ài 用鐵條網圍着 leh。伊 sóa 來 sóa 去，最後逃去軍艦內底匿，逃亡來台灣。來台灣了後，koh 就任總統。伊 tī 軍官訓練團用橫霸面責備受訓 ê 將官：

「我最近視察基隆、淡水 kap 新竹。時間 tú 好是下晡時 4、5 點 nā-niā，m̄-kú 有看著真 chē 士兵走出來路邊，服裝無整齊，khiā tī 路邊 suh 熏、食物件，無一個軍人 ê 體統，一點 á 軍紀 tō 無，真失體面。」

真可憐，伊 ài 靠這陣落衰 ê 軍隊反攻大陸。伊若是正經 beh 反攻大陸，伊一定 ài 知影家己 ê 輕重，ài 檢討是按怎拍輸逃亡來台灣。親像伊寫 ê 「蘇聯在中國」彼本冊，伊一點 á tō 無覺醒。這本冊是陶希聖替伊寫 ê，目的是為着 beh 防止和平共存 ê 政策。和平共存 ê 政策續尾會 hō 共產黨吞去，引起國民政府 ê 滅亡。

政工 kap 特務組織 ê 加強

國民政府 sóa 來台灣了後，蔣介石 tī 軍官訓練團問軍官為啥物國民政府拍輸共產黨。每一個軍官攏應講是因為政治貧污 kap 軍隊 ê 腐敗。蔣介石大受氣，責備講，第 1 原因是軍隊無監督 ê 制度；第 2 原因是組織無完全。

失敗 ê 理由，蔣介石講 he 是因為軍隊無監察制度，政治部變作部隊長 ê 幕僚，部隊長掌權派任政治工作人員，制度無健全。國民革命 ê 初期，政工人員負責灌輸革命主義 hō 部隊長，koh 提供政治知識 ê 教育；政工人員有權力監察部隊長 ê 計劃 kap 實施情形。政工人員是直接受政工組織派任。伊講「黨員是軍隊 ê 枝骨，政工

人員是軍隊 ê 中心。軍隊 ê 政工人員一定 ài hō 黨部派任，bē 使 hō 部隊掌權派任。」

總是，伊想用政工制度 tō 會 tàng 改善軍紀。1950 年伊 sóa 來台灣 ê 第 2 冬，開始進行大修改政工制度，增加政工人員 ê 權力，提高 in chham 副主管相像 ê 地位。

除了政工制度，蔣介石拍拚修改特務制度。抗戰時期，蔣介石 tī 重慶 ê 時陣，伊 ê 特務頭兄是軍事委員會統計調查局長戴笠。戴笠 hōng 叫作東洋 ê Gestapo (蓋世太保納粹德國 ê 秘密警察)。戴笠是蔣介石 ê 同鄉，浙江奉化人。1946 年 tī 南京郊外飛機失事過身。戴笠一生為着拍倒蔣介石政治上 ê 敵人 teh pòah 生命拍拚，所以當 chhōe 著伊 ê 死體 ê 時，蔣介石大聲啼哭。蔣介石失去一個替伊 pòah 生命盡忠 ê 部下，莫怪會大聲哭。

國民政府 ê 軍隊 tī 華北 kap 華中拍輸共產黨 ê 消息傳出來，百姓要求蔣介石落台 kap 解散特務組織 ê 風聲 lú 來 lú 大聲。蔣介石落台了後軍統局 ê 人員減少 kah chhun 70 人。局長毛人鳳 tòe 蔣介石轉去 in ê 故鄉，其他 ê 人留 tī 重慶抑是去台北。蔣介石轉去溪口 ê 時陣是伊政治上上蓋無如意 ê 時代。

蔣介石眠夢反攻大陸

蔣介石走來台灣 siàu 想 beh 靠加強政工制度 kap 回復特務組織反攻大陸。M-kú 加強獨裁權只是會致使過去國民政府 ê 毛病變 koh khah 嚴重，無啥物貢獻。有投機野心 ê 人想 beh 去倚獨裁者，但是獨裁者卻干單選擇 hiah-ê 會曉看 in ê 面色，照獨裁者 ê 意思作代誌 ê 人。真自然，蔣介石會 tàng 得著 ê 消息攏是 tùi hiah-ê 會曉講伊愛聽 ê 話 ê 人來 ê。親像「中國大陸會聽國民政府指揮 ê 遊擊隊有幾 a 百萬」，「中國大陸 ê 百姓 teh 等候蔣介石 ê 軍隊去解救」。1953 年，蔣介石眠夢伊有法度用家已 ê 氣力反攻大陸。伊落台走轉去溪口 ê 時陣，心肝上蓋 bē 爽，伊 tī 上海準備 beh 流亡台灣 ê 時陣，上蓋受著侮辱。看著伊 ê 敵人 tī 延安採用擴大解放區 ê 戰術，伊只有用反攻大陸 ê 眠夢來安慰 bē 爽 ê 心情 kap 所受 ê 侮辱。伊眠夢著國軍反攻，造橋頭堡，引起中國大陸百姓 ê 起叛，擴大自由改放區，最後共產政權崩倒去。

其實，伊 tī 中國大陸沿海 bat 試過遊擊戰術，範圍直到雲南省境界，總是無成功。伊 kā 外國人說明伊 teh 試遊擊戰術，伊竟然知影無效果，mā 已經無 teh 眠夢 a。彼當時 Truman(杜魯門)對台灣 ê 政策是台灣海峽保持中立，所以伊試遊擊戰術會使講是偷試。伊試遊擊戰術試了失敗，Eisenhower(艾森豪)mā 表示無贊成，伊就開始想另外一項代誌。彼當時蘇聯 chhōa 頭 ê 共產集團國家 chham 美國 ê 自由集團國家領袖 tī 越南、東歐 kap Suez(蘇伊士)運河發生相戰，蔣介石 kap 伊 ê 第 1 集團期待世界大戰會發生，siàu 想 beh 拖美國會入去參加全面戰爭。蔣介石因為 beh

hō 中共出手，故意挑戰。伊利用金門砲戰向華盛頓宣傳台灣海峽發生危險。但是美國無 hiah-nih 慫 hō 蔣介石拖落去造成核能戰爭。訪問台北 ê 美國外交官無一人贊成蔣介石 ê 想法。

Pōng 著壁行無路 ê 蔣介石

現此時蔣介石有了解無可能反攻大陸，美國 m̄ 是一個真正有誠意 ê 同盟國。有一個美國高級將官 bat 講伊想 bē 曉，為啥物蔣介石對美國 hiah-nih 無無信心。M̄-kú 對蔣介石來講，he 是真自然 ê 代誌。蔣介石 bat hō 美國救着(備註二)，mā bat hō 美國放放 sak (備註三)。伊無辦法 bē 記得拍輸中共 ê 代誌。雖然美國有防衛台灣 ê 義務(備註四)，伊照常認定美國 m̄ 是真正可靠。

伊家己無本事，mā 無啥物後山 thang 靠，bē 靠得 mā tō ài 靠。1957 年 5 月，台北美國大使館 hōng 拍，蔣介石 tī 中部 ê 別莊聽著，跳起來大發脾氣。伊煩惱美國若是切斷美援，伊 tō 無法度生存落去。M̄-kú 伊 ê 部下目矚放 kheh-kheh，無一人 kā 伊報告美國大使館 hōng 拍 ê 原因。這個情形 kap 1948 年伊 tī 中國大陸拍輸共產黨 ê 情形全款全款。伊就近 ê 部下看着局勢無望，失去志氣，討厭權力。蔣介石 m̄ 知親近 ê 部下有這款毛病。

有人講蔣介石最後 ê 一條路是國共合作。過去有 2 擺國共合作，彼 2 擺會使講攏去 hō 蔣介石 pìⁿ kah 無成功。有關伊對國共合作 ê 見解，伊 tī 1958 年發表 ê 「蘇聯在中國」內面寫真清楚。這本冊就是蔣介石對國共合作 ê 答案。若 m̄ 是伊 tī 西安事件 ê 時去 hō 中共關 14 日，絕對無可能 koh 再國共合作。真可能伊是 beh 恐嚇美國，才假演國共合作 ê 戲。其實，伊真了解用這款個步數對伊 ê 生命有危險。

無管蔣介石按怎想辦法，伊 mā 已經用「反攻大陸」政策統治台灣 10 冬，伊只有 koh 再用無可能實現 ê 「反攻大陸」政策繼續行獨裁路線，其他無啥物路好行。